

UNSA'Y ATONG PAGABUHATON NIINING JESUS NGA GITAWAG OG CRISTO?

✉ . . .-pon, gusto kong dalion, tungod kay nahibalo ako nga kapoy na kamong tanan sa pagpabilin pa sa simbahan, (salamat, sir), sa pagpabilin sa simbahan karon. Gusto kong gamiton kining gamay nga kahigayonan, bisan pa, sa pagpahayag sa akong pagpasalamat kang Igsoong Demos Shakarian.

² [Blangko nga bahin sa teyp—Ed.] . . .wala pa nagkatigum ingon nga Pentecostes, ilalum sa mga grupo-grupo. Daghan kaayong mga panagkalahi. Apan adunay usa ka lugar kon diin aduna kita og pagkaparehas, ilalum sa Dugo ni Jesus Cristo, dinha kita adunay pagkaparehas. Ingon niana ang paagi sa Dios aron nga magkatagbo kita, bisan pa man. Ug wala na'y uban pang lugar nga gisaad sa Dios aron tagbuon ang tawo, ilalum lamang sa giula nga Dugo.

³ Gihunahuna ko kagabii ang atong igsoon, si Oral Roberts, sa diha nga gihimo niya kadtong maanindot nga pahayag dinhi, mahitungod sa, “Gikan sa kinasuloran niya modagayday ang mga sapa sa tubig.” Ang halangdong. . . Kung giunsa niya kadto paghisgot, mahitungod sa, “gikan sa iyang kasingkasing,” nagtoo ko nga miingon siya, “mogawas, modagayday kining mga sapa sa tubig.”

⁴ Nahimatikdan ba ninyo, nga mga sapa kini sa usa ra ka tubig? “Mga sapa,” pang-dinaghan; “tubig,” usa ra. Dili nga “mga sapa sa mga tubig”; kondili, “mga sapa sa tubig,” usa ra ka Espiritu. “Pinaagi sa mao rang Espiritu gibautismohan kitang tanan ngadto sa mao ra nga Lawas.” Nagadagayday gikan Kaniya ang kaayo ug grasya sa Dios.

⁵ Ug karon, kamong mga taga-California, manganha mi sa inyong estado, sugod sa sunod nga semana, siguro, dinha dapit. Ug dayon diretso na didto sa Georgia, Louisiana, Florida, hangtud paadto na kami sa gawas nasud.

⁶ Pagapanalanginan kamo sa Ginoo, og daku. Ginapasalamatan ko ang mga babayeng mitugtog sa musika, ug kining maayo kaayong mga lalaking nahimamat ko.

⁷ Kining bag-o nga igsoon dinhi, si Igsoong Solomon King. Mahimong nasulti ko kana nga sayup. Mahunahunaan ko si Haring Solomon, ug ibali lang kini. Kana'y panahon kaniadto;

kini mao ang laing hari, usab. Husto kana. Usa ka anak sa Hari, bisan pa man, husto kana; anak sa usa ka Hari; dili sa usa lang ka hari, *sa* Hari gayud!

⁸ Pagmakita ko kini, nagapahinumdom kini kanako bahin sa Mexico didto, pipila ka tuig na ang milabay didto sa Mexico City. Didto kami usa ka gabii kaniadto, may usa ka buta nga tawo didto, sa nahaunang gabii, ang misaka sa entablado, nga buta gayud sulod sa daghan nang mga tuig. Gitan-aw ko ang iyang mga tiil. Nagatindog ako didto nga sul-ob ang usa ka maayong amerikana, nga nakasapatos. Gitan-aw ko ang iyang. . . Buta siya, walay sul-ob nga sapatos, gision ang karsones, nga nagatindog didto nga nag-ulan. Oh, mahimong traynta ka libo, o sobra pa, ang nagatindog didto nga nag-ulan, nga nanagsandig sa usa'g usa, wala na'y mga lingkuranan; nga atua na didto sa sayo pa kaayo niadtong buntaga, nanaghulat hangtud niadtong gabhiona. Ug didto na kining buta nga lalaki, nga nakadawat sa iyang panan-aw.

⁹ Ug pagkasunod nga gabii, nagdaghan, mga doble na ang gidaghanon sa niining bangko dinhi, unsa man ang tawag nato niini, apan didto lang sa entablado, ang tipun-og nga halos ingon na kataas nianang nagbitay nga kurtina, sa daan na nga mga panyolon ug mga sinina, ug nga gipanul-ob kaniadto sa mga tawo ug gipanglabay didto. "Aron lang nga mahikap namo kadto!"

Halos ang tanan mga Katoliko, siyempre, didto sa Mexico City.

¹⁰ Ug miadto ako, ingon nga una gayud nga Protestante nga nakaadto ilalum sa pagdapit sa militar. Gikan kadto kang General Valdivia, ang maayo natong higala dinhi, Full Gospel Business Men.

¹¹ Nahinumduman ko nga niadtong gabhiona, adunay siyagit nga nagagikan sa gawas. Ug miduol kanako ang anak kong lalaki, miingon, "Aduna ko'y labing minos og usa ka gatus ug singkwenta ka mga usher, o sobra pa, nga atua didto, ug dili nila mapugngan ang usa ka gamay nga babayeng Katsila. Aduna siya'y usa ka patay na nga masuso, nga namatay kaganinang buntag." Miingon, "Dili nila mapugngan ang maong babaye didto." Miingon, "Mokatkat man siya sa ilang likod ug tanan na."

Ug ingon ko, "Bueno, dugangi lang og tigbantay."

Miingon siya, "Wala na gyud ko'y ikadugang pa nga mobantay."

Ingon ko, "Hatagi siya og prayer card."

Miingon, "Wala na ko'y bisan usa. Napanghatag na tanan."

¹² Ingon ko, "Igsoong Moore, adtoi ug iampo siya," ingon ko, "wala bitaw siya nakaila kanako." Ug ingon ko, "Adtoi ug iampo

siya. Ug paninguhaon kong mag-ampo alang niining dakung tipun-og sa mga sinina, sa pipila lang ka mga gutlo.”

¹³ Ug samtang nagatindog ako didto, milantaw ako ibabaw niadtong mga mananambong sama *niini*, ug sa atubangan ko ang maong gamay nga masusong Mexicano, nga wala pa’y ngipon, nga nagapahiyum lang, didto mismo sa akong atubangan. Miingon ako, “Kadali lang, Igsoong Moore.”

¹⁴ Ug gidala nila ang maong gamay nga bata. Ug miduol ang babaye, miluhod, nga dala ang usa ka krusipiho diha sa kamot niya. Miingon ako, pinaagi sa usa ka igsoong lalaki, nga tighubad, nga patindogon siya.

¹⁵ Ug miingon ako, “Igsoong Moore, wala ko kabalo kung mao ba kini, o dili, apan nakakita ako og usa ka gamay’ng masuso nga anaa sa atubangan ko, diha sa usa ka panan-awon bag-ohay lang, nga nagapahiyum.”

¹⁶ Giputos niya kini diha sa usa ka gamay, asul ug puti nga budlisbudlison nga habol, nga basa na kaayo. Nagaulan niadto. Mga alas diyes na kadto sa kagabhion. Namatay ang maong bata niadtong buntag pa lang, sa mga alas otso o alas nuebe, didto sa opisina sa doktor, tungod sa pulmonya. Ug dugay na nagatindog ang maong babaye didto nga naulanan. Nakadamlay na ang buhok diha sa iyang nawong, ug usa siya ka maanyag kaayo nga batan-on pa nga babaye. Kon tan-awon siya tingali, una niya kadto nga anak, anaa siya sa mga baynte anyos pa nga pangidaron. Ug namatay ang maong gamay nga bata.

¹⁷ Ug gipandongan ko kini sa akong mga kamot, ug ingon ko, “Ginoong Jesus, wala ako nakasabot niini, apan sumala niadtong panan-awon nga nakita ko...” Ug pagkasulti ko niadto, misipa kini ug misiyagit, ug nabuhi ang mao nga bata.

¹⁸ Ug kauban ko si Igsoong Espinoza. Kinsa man ang nakaila kang Espinoza, kang Igsoong Espinoza? Siya ang nagsusi niini didto sa opisina sa doktor, nakaplagan nga matuod kini, kita n’yo, husto kana, nga namatay ang mao nga bata niadtong buntaga, aron mapirmahan ang mao nga pamahayag.

¹⁹ Ug busa karon Siya ang mao ra sa gihapon nga Dios sa karon, kung mahimo lang nato nga magkaaduna og mao ra nga matang sa pagtoo diha Kaniya. Husto kana.

²⁰ Langitnon namong Amahan, ipadala kanamo kadtong pagtoo sa maong gamay nga babayeng Mexicana, karon. Nakita niya kadtong luoy, buta nga tawo nga naayo, niadtong gabii bag-o kadto. Sa pagtindog niya didto nga dala kadto nga bata, niadtong matugnaw, nagahaguros nga hangin, nagkapulmonya kini. Ug pagkasunod nga buntag, sayo niana, namatay kini didto sa opisina sa doktor. Ang unang misulod sa iyang hunahuna, “Kung mahimong ayohon sa Dios ang mga mata nga buta na, nga makabutyag sa mga tinago sa kasingkasing, ang Pulong kini sa Dios sa gihapon, kay matugkad sa Pulong sa Dios ang

mga hunahuna nga anaa sulod sa kasingkasing.” Ug nahibalo siya nga mahimo sa Dios ang pagtugkad sa mga hunahuna nga atua sa iyang kasingkasing. Mitoo siya Kaniya, ug nga mahimo Niya banhawon si Lazarus gikan sa lubnganan, ug nga Siya mao sa gihapon kagahapon, karon, ug hangtud sa kahangturan. Miduol siya, ug Imo siya gigantihan, Ginoo, pinaagi sa pagbalik mo kaniya sa iyang anak. Buhi kini sa karon, kutob sa among nahibaloan. Amo Kang ginapasalamatan tungod niini.

²¹ Panalangini kami, karon, Amahan. Panalangini kini nga mga tawo uban niining mga panyo ug mga sinina nga ginapahamutang dinhi, usab. Ug hinaut nga moanhi karon ang Imong Balaang Espiritu ug ipaambit kanamo ang Pulong sa Dios. Among ginapangamuyo sa Ngalan ni Jesus. Amen.

²² Kabalo ko nga aduna mo’y miting sa dili magdugay, o sa alas singko, siguro. Ug kasagaran dili kana makahatag kanako og oras sa pagsugod pa lang, apan ako—nabag-o na ako gumikan niana, sa tan-aw ko, karon. Nanguha ako og ayo niining semanaha, may sakit man sa tutunlan, tingali miduyog nga nagapamuhat kini alang sa ikaayo.

²³ Giingnan ko ang mga tawo sa miaging adlaw, ako—aduna ko og peluka, apan naulaw akong sul-obon kini tungod nga ginakasab-an ko og ayo ang mga kababayan-an mahitungod sa ilang buhok. Ug ako—naupaw ang buhok ko tungod sa carbolic acid. Ug sa miaging gabii giablihan nila kana nga pultahan, patuyok nga misulod ang hangin dinhi, ug wala ko maghunahuna nga makabalik pa ako karong adlaw. Ingon ko, “Kung ania dinhi si Oral Roberts, mahimo siyang mopuli, kung okey kaniya.” Wala pa man siya miabot, busa magbasa ako og Kasulatan, ug iampo ninyo ako.

²⁴ San Mateo, sa ika-27 nga kapitulo, sugod sa ika-11 nga bersekulo, gusto kong basahon. Karon maminaw og ayo sa pagbasa sa Pulong. Tungod kay, pulong lang sa tawo ang akong pulong, mapakyas kini. Ang Iyahang Pulong dili mahimong mapakyas, busa maminaw gayud sa dihang atong basahon.

²⁵ Ug sa dili pa, samtang nga nagaabli kamo, gusto nako ipahibalo nga ang atong igsoon, si Oral Roberts, moadto didto sa Jerusalem, usab, sa sunod nga Biyernes sa gabii, busa kung gusto ninyo tanan nga motambong. Moingon mo, “Asa nga lugar?” Adunay miingon nga usa ka yutang saad ang Florida, siguro mahimo kong ingnon nga ang Tucson, Jerusalem. Ang Phoenix atua sa walog, kita n’yo, ug ang Jericho atua lang sa walog gikan sa Jerusalem. Dili na gyud ako makagawas dinhi nga ingon niana, dili ba? Magawali si Igsoong Oral Roberts sa sunod nga Biyernes sa gabii ug sigurado akong malipay kamong maminaw kaniya. Malipay kami nga makauban kamo didto.

²⁶ Ika-27 nga kapitulo, sa ika-11 nga bersekulo.

Ug si Jesus nagtindog sa atubangan sa gobernador: ug ang gobernador nangutana kaniya, nga nagaingon, Ikaw ba ang Cristo sa mga Judio? Ug si Jesus miingon kaniya, Giingon mo.

Ug sa (mga punoan) ginasumbong siya sa mga punoan sa mga sacerdote ug sa mga anciano, ug sa . . . ug siya walay gitubag.

Unya si Pilato miingon kaniya, Wala ba ikaw makadungog sa daghang mga butang nga ginapamatud-an nila batok kanimo?

Ug siya wala motubag kaniya bisan usa lamang ka pulong; tungod niana ang gobernador nahibulong og . . .

Ug sa panahon sa fiesta nabatasan sa gobernador . . . sa pagbuhi alang sa katawhan og usa ka binilanggo, kung kinsa ang buot nila nga buhian.

Ug niadtong panahona dihay ilang usa ka bantugang binilanggo, nga ginganlan og Barrabas.

Busa sa diha nga nanagkatigum na sila, miingon kanila si Pilato, Kinsa ba ang buot ninyo nga pagabuhian ko kaninyo? Si Barrabas ba, o si Jesus nga ginatawag nga Cristo?

Kay iyang hingbaloan nga tungod sa kasina ilang gitugyan siya.

Samtang nga sa dali nga nakalingkod siya diha niini, naglingkod sa lingkuranan sa hukmanan, gipasugoan siya sa iyang asawa, sa pag-ingon, Ayaw . . . ayaw baya pagpanghilabut niining tawo nga matarung: kay karong adlawa daghan ang giantus ko sa damgo tungod kaniya.

Apan ang mga punoan sa mga sacerdote ug ang mga anciano nag-uloulo sa katawhan nga pangayoan nila si Barrabas, ug sa pagpatay kang Jesus.

Ang gobernador mitubag ug miingon kanila, Hain niining duruha ang gusto ninyong buhian ko alang kaninyo? Ug miingon sila, si Barrabas.

Si Pilato miingon kanila, Nan unsaon ko man kini si Jesus nga ginatawag nga Cristo? Silang tanan miingon, Ilansang siya sa krus.

Ug ang gobernador miingon, . . . unsa ba'y iyang nabuhat nga dautan? Apan misamot sila sa pagsinggit, nga nagaingon, Ilansang siya sa krus.

. . . sa hingkit-an ni Pilato nga wala siya'y dag-anan, kondili nga nagadugang pa hinoon ang kasaba, mikuha siya sa tubig, ug nanghunaw sa iyang mga kamot sa atubangan sa katawhan, nga nagaingon, Wala ako'y

sala sa dugo niining matarung nga tawo: kamo ang mahibalo.

Ug mitubag ang tanang katawhan, ug miingon, Ang iyang dugo ipapaningil lang gikan kanamo, ug sa among kaanakan.

Unya iyang gibuhian alang kanila si Barrabas: ug tapus niya ipahampak si Jesus, iyang gitugyan siya aron ilansang sa krus.

27 Ang akong hilisgutan karon, kung tawgon ko man kini og ingon niana, sulod sa sunod nga traynta ka minuto, mao'y: *Unsa'y Atong Pagabuhaton Niining Jesus Nga Gitawag Og Cristo?* Ug dayon gusto kong isulti kini, usab, “Si Jesus nga anaa sa atong mga kamot.”

28 Karon, nagatoo ako nga ang takna kon diin nagasugod ang atong esena, niadtong pabanagbanag na, didto sa balay hukmanan ni Pilato. Ug usa kadto sa mga pinakasubo nga panahon, ug usa sa pinakalabing mahinungdanon nga panahon, sa tanan nga kasaysayan. Kadto ang pinakasubo nga sayup nga nahimo sa iglesia sukad-sukad sa kasaysayan niini. Bag-o lang nila gibuhat kadto, ug gitugyan kini karon nga katungdanan ngadto sa gobernador, sa estado. Pareho sa iglesia ug sa estado, tungod kay mga tawo silang gipili sa Dios, gitawag ingon nga Iyang mga alagad, ug angay man nga ang nasud pagadumalahon pinaagi sa mga balaod sa Dios.

29 Ug gisalikway sa iglesia kaniadto ang ilang Mesias. Bisan pa nga tuman na Siya gipaila ngadto kanila, mas gipili nila nga magpabilin sa tradisyon sa ilang mga katigulangan niadtong panahona, kaysa toohan ang dinihogan, gipanghimatud-an nga Pulong nga gisaad na sa Dios kanila sulod sa ginatus na ka mga katuigan, nga moabut.

30 Nahimatikdan ba ninyo, gipropesiya usab niini nga mabutahan sila? Dili nila masabtan kini, ug kung unsa nga mabutahan sila, apan nahitabo gyud kanila.

31 Ug nahimo nila ang ilang dakung sayup, ug niadtong adlaw a gihimo nila ang ilang ulahing pagpakita niini. Ug ania na kini karon sa mga kamot sa gobyerno, ug karon kinahanglan nga buhaton sa gobyerno ang pagdesisyon niini. Human na Siyang gisalikway sa mga kaiglesiahan, bisan pa nga hingpit siyang gipamatud-an sa Dios nga Siya mao ang ilang Mesias.

32 Karon gusto kong mokuha og pipila ka minuto sa dili pa kita moadto niini, ngadto sa teksto ug uban pa, nga aduna ako og mga sinulat dinhi bahin niini. Giunsa man niadtong mga tawhana nga napakyas sila nga makita kadto? Usa ka butang ang klaro gayud nga ginaingon sa Kasulatan, “Mga buta sila.” Apan malisud sa pagpasabot kanila nga mga buta sila, ingon niana gayud ka lisud sama sa karong panahon.

³³ Sa dihang, nagaingon ang Biblia nga kini nga henerasyon mao'y "hubo, makaloolooy, kabus, ug buta, ug wala nakahibalo niini." Karon, ang Kasulatan kana. Karon isulti ninyo kanamong mga Amerikano nga mga buta kami, dihadiha dayon sultihan kamo namo nga wala kamo nahibalo sa inyong ginasulti.

³⁴ Apan dalhon ko kamo ngadto sa pagbista niining hapon, hibaloa kung buta ba gayud kita o dili. Ug anaa kanato ang pagbista kang Jesus, niining hapon, ug ang Iyang Dugo anaa sa atong mga kamot, ug karon gusto natong makita kung unsay atong pagabuhaton bahin niini. Pagabuhaton kaha nato ang mao rang dinanghag nga sayup nga ilang gibuhat kaniadto?

³⁵ Himatikdi kung unsay nahitabo. Klaro na gayud Siyang gipaila, ug gituman ang katungdanan nga giingon sa Dios nga Iyang pagabuhaton, ingon nga Mesias. Walay pagduhaduha niini. Kay, natawo man Siya sa paagi nga giingon na sa Dios nga matawo Siya. Gisalikway Siya sa paagi nga giingon na sa Dios nga igasalikway gayud Siya. Gipamatud-an na Niya ang Iyang Kaugalingon nga mao ang Mesias, tungod kay Dios ang maong Mesias. Ang *Mesias* nagakahulogan og "ang dinihogan." Ug dinihogan Siya sa—sa bug-os kinatibuk-an sa pagka-Dios, nga sa pagkalawas mipuyo Kaniya. Dili lang Siya usa ka propeta. Bisan pa man, usa Siya ka Propeta, apan labaw pa Siya kaysa propeta. Siya ang pagka-Dios nga sa pagkalawas nagapuyo diha sa usa ka tawong naila ingon nga Anak sa Dios. Ang Dios, ang Amahan, gilandongan ang usa ka ulay ug gilalang diha sulod kaniya, ang Dugo, sulod sa iyang tagoangkan, usa ka selulang Dugo nga nagpahimugso sa Anak sa Dios, nga maoy gipuy-an sa Dios.

³⁶ Ug gipaila Siya ngadto kanila, ingon Kung Kinsa Siya nga giingon Niya, apan wala gayud Siya nagpasundayag mismo ug nagsulti kanila, "Ako mao ang Anak sa Dios." Wala, wala. Kinahanglan nila nga toohan kana. Miingon Siya, "Ang Akong mga buhat nagapamatuod Kung Kinsa Ako." Gisugo Niya sila, "Tan-awa ninyo ang mga Kasulatan," ug makita ninyo kung unsa na nga adlaw ang inyong ginapuy-an, kung ingon-ana mailhan nila kung kinsa Siya.

³⁷ Ang tan-aw ko nga angayan lang alang kanato nga buhaton kini, ingon nga makita nato nga duol na ang usa na usab nga exodo. Sa tan-aw ko nga angay natong tan-awon, ug susihon ang mga Kasulatan, sa dihang makita nato ang maong mga butang nga nagatungha na.

³⁸ Mahimatikdan nato kung ingon-ana nga ang iglesia mihimo na sa ilang pagdesisyon, nga ayaw nilang magkaaduna og unsa man nga kahilambigitan Kaniya. Ngano man, sa diha nga husto Siyang gipaila sa Pulong, ug nagpamatuod ang Iyang mga buhat nga Siya mao ang Mesias? Usa gayud ka makalilisang, makuyaw nga butang, nga sayup, nga gihimo niadtong iglesiaha!

39 Ug naghunahuna ako kung posibli kaha nga mahimo nato ang mao usab nga kasaypanan? Gikahatagan sila kaniadto sa ilang ulahing kahigayonan aron makita kung unsa Siya, ug aron nga dawaton Kini. Karon, sa kanunay wala kamo'y kahigayonan aron dawaton kung unsa ang pinadala sa Dios. Kita n'yo, ang Iyang pagpailub mahurot usab sa kaulahian, ug dayon milapas na kamo sa nianang utlanan tali sa grasya ug paghukom. Wala na'y nahibilin gawas sa paghukom pagnahurot na sa kaulahian ang pagpailub sa Dios.

40 Apan gihatag na kanila kadto nga kahigayonan, ug nakita Siya nga ginapaila ang Iyang Kaugalingon, nakita Siya didto sa atabay uban sa babaye, ug gisultihan kini nga nagkaaduna kini og lima ka bana. Nakita si Natanael nga miduol Kaniya, human nga miadto si Felipe ug gidala si Natanael ngadto sa Iyang Atubangan, ug nagsulti Siya ug eksaktong giingon kung kinsa kini ug kung asa kini siya gikan. Giingnan si Simon Pedro kung kinsa ang iyang amahan, ug kung unsay iyang ngalan. Ug wala sila nagkaaduna og usa ka propeta sulod sa ginatus na ka mga tuig.

41 Ug bisan kadtong luoy nga babayeng bigaon nakaila sa Pulong sa Dios. Wala man lang siya nalibog sa kung unsa nga butang. Siya, siya, bueno, ang iyang hunahuna wala man lang, sa kung unsay tawag nato, kung ipasaylo unta ninyo ang linitokan niini, "nagkalibog," nga nagadagan *dinhi* ug nagadagan *didto*. Usa kadto ka ulay nga hunahuna, kung kana ang paghisgotan. Miingon siya, "Nahibalo kami nga taliabot na ang Mesias, ug ingon niini ang Iyang pagabuhaton."

Ug miingon Siya, "Ako mao Siya."

42 Ug madali siya nga midalagan, gisultihan ang mga tawo didto sa siyudad, "Umari kamo, tan-awa ninyo Siya, kini na ang mismong Mesias."

43 Aba, kadtong mga tigpanudlo ug ang mga tawo niadtong panahona dili nila makita kadto. Kini, malisud nga makita kini kung wala kamo nahibalo sa mga Kasulatan. Apan nag-ingon ang Kasulatan, "Mga buta sila." Sa tinuod gipangbutahan sila. Apan ilang gipili, hinoon, imbis kadtong hiligugmaon nga si Jesus, didto sa . . . Madungog nato ang pagsinggit nga ginapakita didto, "Ilansang Siya!"

44 Miingon si Pilato, "Unsa ba'y akong pagabuhaton niining Jesus nga gitawag og Cristo?"

Miingon sila, "Ipahilayo Siya! Ilansang Siya sa krus!"

"Kinsa man ang pagabuhian ko alang kaninyo, si Barrabas ba o si Jesus?"

45 Ug gihimo nila ang dinanghag nga sayup pinaagi sa pagpili sa usa ka mamumuno imbis ang tighatag-sa-Kinabuhi. Ang usa nga napaila na ingon nga tighatag-sa-Kinabuhi, gipili nila

ang usa ka mamumuno nga napaila na ingon nga tigkuha-og-kinabuhi. Pagkadaku nga kalainan! Ug unsa kaha kung . . .

⁴⁶ Akong ginasulti kini nga may bug-os og diosnon nga pagtahud sa kaigsoonan kong mga lalaki ug babaye, ug alang sa mga kalalaken-an ug mga kababayen-an sa niining panahon, nga ginawalihan ko, dala ang paghigugma sulod sa akong kasingkasing alang sa tanang mga tawo: ginahunahuna ko kung dili pa kaha nato halos makita na ang mao rang butang sama sa ilang nakita kaniadto! Nahilambigit ang gobyerno niini, ug ang—padayon ang mao ra nga hilisgutan. Kinahanglan nga matubag na ang pangutana. Usa kadto ka pagpakigsangka.

⁴⁷ Ingon-ani usab kini sa karon, ingon-ani usab kini sa niining takna! Misugod na ang pagpakigsangka! Kinahanglan may butang gayud nga pagabuhaton, kinahanglan nga magsulti kamo og “oo” o “dili.” Apan, hinumdumi, dili na ingon niini kini paggipugos ra mo sa pagbuhat niini. Kinahanglan ninyong buhaton kini karon basi sa inyong gawasnon nga katungod sa pagpili. Karon na! Dili kon kanus-a nga moabot pa kana nga kahigayonan; pagmoabot kana, kini human na. Karon na! Mahimo nga kini na ang ulahing adlaw nga aduna kamo’y panahon sa pagdesisyon. Dili na ninyo mahimo kini nianang tungora pa, imo nang napalagpas kini; ulahi na kaayo, sa nianang panahona. Kinahanglan ninyong buhaton kini karon. Ayaw hulata hangtud sa ulahi na nga takna, tungod kay mobiyahe na ang barko ug biyaan na kamo. Pagasiradohan na ang pultahan.

⁴⁸ Daghang mga tawo kaniadto ang nakasulod unta sa arka kung nakaabot lang sila didto, sa diha nga misugod na pagulan. Apan human na kaniadto ang hilisgutan, giwali na ang Ebanghelyo, gipakita na ang mga ilhanan; ug human na ang panahon, miulan na kaniadto, misugod na ang paghukom.

⁴⁹ Karon, kinahanglan Siyang isalikway sa tibuok nasud, tungod nga gitawag kadto, sama sa kung ingnon nato karon, “usa ka Cristohanong nasud,” sama nga gitawag kini nga usa ka Cristohanong nasud. Busa, kung gitawag kadto nga nasud ni Jehovah, Iyang pinili nga katawhan, kung ingon-ana kinahanglan Siyang isalikway sa maong tibuok nasud. Gisalikway na Siya daan sa iglesia. Gipalagpot na Siya pagawas sa iglesia. Ayaw nilang magkaaduna og unsa man nga kahilambigitan Kaniya, apan karon naapil na niadto ang gobyerno.

⁵⁰ Mao nga nagabalik na usab kini, nagabalik na usab kini nga pagaatubangon, uban sa Kasulatan nga napahimutang dinhi, nga gipaila, sa eksakto gayud kung unsay giingon ni Jesus nga magakahitabo. Nganong pasarasay pa man kita sa niining panahon sa kangitngit? Nganong ginatugotan man nato kini nga moabot kanato, sa dihang bug-os na kitang napasidan-an? Sama

gayud sa nahitabo kaniadto sa mga adlaw ni Lot, makita nato ang mao mismong butang. Giplastar na ni Jehovah ang maong esena, ug gisultihan kita, “Sama sa nahitabo kaniadto sa mga adlaw ni Lot!” Makita na ninyo ang maong mga mensahero didto sulod sa Babilonia, nga ginapaninguhaan nga ipagawas si Lot; ug makita na ninyo ang Mensahe alang ngadto sa mga Pinili, kang Abraham, nga atua na daan sa gawas. Ug ang tanan na, sa eksakto, hangtud sa ngalan, lugar, ug panahon, bug-os nang gipaila.

⁵¹ Apan karon ania na kini sa mga kamot sa gobyerno. Kinahanglan nga kondenahan na kini karon sa gobyerno, ug ila gayud buhaton kini. Dili kamo magkabalaka niini. Usa kini ka Cristohanong nasud, kinahanglan nga tindogan niini ang iyang Cristohanong baruganan, kung mao gayud siya. Misugod na ang pagpakigsangka.

⁵² Kinahanglan dalhon na ngadto sa paghukom ang tibuok nasud. Tungod kay, nahitabo kini niadtong mga A.D. 70, sa diha nga ang Romanong heneral, nga si Titus, gipalibotan ang Jerusalem kaniadto, niadtong A.D. 70, sa iyang mga kasundalohan gikan sa Roma, ug didto nila gibayaran ang kabayaran tungod sa pagsalikway Kaniya.

⁵³ Karon, samtang nga atong ginatan-aw kadto nga pagbista didto, ug nagagawas kita dinhi ug nga ginaawat-awat kini sa nagkalainlaing pamaagi, ang maong mga pagbista niadtong Biyernes Santo, ug nga ginahisgotan kini, ug ingon-anang mga butang. Ug ang mao mismong butang nga atong ginahisgotan, nga nahitabo niadto nga Biyernes Santo, ania mismo sa atong atubangan karon! Ug ginabuhat sa atong mga elder ang mao rang butang nga ilang gihimo kaniadto, ginadala kini ngadto sa usa ka parehong pagbista, human nga ang parehong Pulong nga gikasaad alang niining panahona gipanghimatud-an sama sa gipanghimatud-an kini didto kaniadto.

⁵⁴ Si Jesus, “usa ra ka ordinaryong anak sa panday,” ingon niana ang dahum. Siya mao ang Pulong sa Dios nga nadayag. Ug bug-os Siya napaila, tungod sa mga buhat sa Dios nga nadayag ang mga niini pinaagi Kaniya, ug nga nagpamatuod nga Siya mao ang Mesias.

⁵⁵ Ug, karon, miabot na usab kana nga samang panghitabo, sa diha nga ang Balaang Espiritu miabot kanato sa kaulahiing mga adlaw ug gipaila mismo ang Iyang Kaugalingon diha sa atong iglesia, ug gipamatud-an ang mao rang mga buhat nga Iyang gibuhat kaniadto sa dihang ania pa Siya sa kahupnganan kang Jesus Cristo. Iyang gibuhat diha sa Pangasaw-onon ang mao rang butang, ginahimo ang mao mismong butang, ug sa gihapon gusto natong palagputon Kini.

⁵⁶ Hinumdumi, kining mga teyp nga ginarekord na karon, nga nagakadangat sa tibuok kalibutan, dili lang dinhi sa Phoenix.

Nagapakigsulti ako ngadto sa katunga sa kalibutan, sa niining taknaa, tungod nga aduna kita og buluhaton sa pag-teyp nga nagakadangat sa tibuok kalibutan.

⁵⁷ Himatikdi, aduna kita karon og usa ka parehong pagbista, sa mao rang gipaila nga Pulong. Mga Hebreohanon 13:8, “Si Jesus Cristo mao sa gihapon kagahapon, karon, ug hangtud sa kahangturan.” San Juan 14:12, “Ang nagatoo Kanako, magahimo usab sa mga buhat nga Akong ginabuhat.” Mateo 28, “Sa tibuok kalibutan, iwali ang Maayong Balita sa tanang binuhat.” “Ania karon, sa diriyut lamang panahon ug ang kalibutan dili na makakita Kanako; apan kamo makakita Kanako, kay Ako magauban kaninyo, maanaa kaninyo, hangtud sa katapusan sa panahon.” “Si Jesus Cristo mao sa gihapon kagahapon, karon, ug hangtud sa kahangturan!”

⁵⁸ Ilang gipili karon, dili lang ang usa ka mamumuno, kondili usa ka mamumuno sa Pulong, usa ka kaliwat sa mismong pinakaunang mamumuno.

⁵⁹ Sa diha nga silang, mga apostol nagawali kaniadto sa Maayong Balita, ug padayon hangtud kang Irenaeus, ug daghan sa mga repormador ug mga magtutukod niadtong nahaunang kapanahonan, nga midangat kini ngadto sa Niceaea, usa ka higayon, para sa usa ka pagpakigsangka, ug nagdesisyon sila kaniadto nga magtukod og usa ka iglesia nga para sa tanan, aron pugson ang mga tawo nga magpailalum sa ilang kamandoan. Daghan sa mga nagabasa sa kasaysayan dinha, ang nakahibalo nga daghan ang miabot didto nga tigulang nga mga ginapeta nga panit sa mananap ang sul-ob nila, nga mga utan lang ug ingon-anang mga butang ang ginakaon, ug naninguha sila nga manghawid niadtong Pulong, manghawid sa Pulong sa Dios. Apan unsa man ang ilang gibuhat sulod niadtong kinse ka adlaw sa madugoon nga pamulitika? Nagdesisyon sila sa kaulahian nga magtukod og usa ka iglesia para sa tanan, ug nagsumbak og pipila ka paganismo ngadto sa Cristianismo, ug gipahiluna kini didto ingon nga usa ka iglesia para sa tanan.

⁶⁰ Ug, karon, managkauban nga ginapahisakup sa mga Protestante ang ilang mga kaugalingon diha sa Ecumenical Council, nga ginabuhat ang mao rang butang, nga ginasumbak ang mga tradisyon sa tawo, ug imbis nga dawaton ang Pulong sa Dios nga bug-os nang gipaila pinaagi sa Espiritu Santo, nga Siya mao sa gihapon kagahapon, karon, ug hangtud sa kahangturan. Nagatindog ang iglesia diha sa timbangan, karon, ug nga nakaplagan nga kulangan. Ania na pud kamo sa balay-hukmanan ni Pilato. Oo, sir.

⁶¹ Unsa ma'y ginabuhat niini? Nagahimo kini og usa ka larawan alang sa mapintas nga mananap. Usa kini ka ulipong sumusunod sa Roma. Sa diha nga ang Ecumenical Council nagapamugos na, ug pagapugson gayud ang matag

Protestanteng denominasyon pasulod niini; ug halos anaa na ang tanan dinha karon, ang mga Full Gospel ug tanan na. Moabot ang takna sa diha nga kinahanglan na gayud silang mosulod o magpabilin sa gawas, ug, nianang panahona, pagmoabot na kana nga pagpamugos, napaila na ninyo ang inyong kaugalingon nga aduna na'y marka sa mapintas nga mananap. Karon, eksakto gyud kana.

⁶² Unsa man kini? Protestanteng mga bigaon nga kauban na ang tigulang nga inahan niini, ang Roma, ang bigaon! Nag-ingon ang Pinadayag 17 nga siya mao “ANG INAHAN SA MGA BIGAON,” eksakto, Protestanteng mga denominasyon; nga gunit niya diha sa iyang kamot ang kopa sa kaligutgot sa—sa Dios, alang sa iyang tagay, sa iyang pagpamatuod, “*kini* maoy among ginatoohan,” ug ang matag usa usab, “*kini* maoy among ginatoohan.”

⁶³ *Ania* ang angay'ng pagatoohan sa Iglesia, ang Pulong sa Dios, “ug tugoting bakak ang pulong sa tanang tawo.” Angay'ng ingon niana kini.

⁶⁴ Apan atong ginadala na usab si Cristo ngadto nianang grabe og makuyaw nga takna nga Iyang nahimutangan kaniadto, diha sa balay-hukmanan ni Pilato; makaluluoy nga, usa ka gamay'ng panon ang ginasiikway lang ngadto sa usa ka daplin, nga nagdungo ang ulo. Gisalikway sila sa ubang mga denominasyon, gibalibaran sila, ug gipapahawa sila, ug nagingon, “Ayaw gayud nga magkaadunay kahilambigitan Niini!” Mas maayo pa nga susihon ninyo ang Pulong. Karon makita nato, kining Ecumenical Council maoy. . . Unsa ma'y ginahimo niini? Kini, Ang Biblia. . .

Moingon mo, “Nagasulti ba ang Biblia mahitungod niana?”
Oo.

⁶⁵ “Nga nagabaton sa dagway sa pagkadiosnon, apan nagapanghimakak sa Gahum niini.” Buta, hubo, nga mga magsisimba lamang, nagabaton sa dagway sa pagkadiosnon, apan nagapanghimakak sa Gahum sa Espiritu Santo nga mao ang nagapaila kang Jesus Cristo diha sa Iyang Pulong. Unsaon man sa usa ka tawo pag-angkon nga adunay Balaang Espiritu ug ginapanghimakak ang matag Pulong nga maoy Balaang Espiritu? Unsaon man pagbuhat niana sa usa ka tawo? Ang kaugalingon niyang pagpamatuod nagasaki nga dili siya mao kung unsay ginaangkon niya nga mao unta siya, nagapamuhat og espirituwal nga pagpakighilawas, ginapanghimakak ang Gahum sa Dios. Si Pablo nag-ingon, diha sa Ikaduhang Timoteo, sa ika-3 nga kapitulo, nga mao kana ang magakahitabo, miingon, “Mamahimong mga gahi'g ulo, hambugiro!”

⁶⁶ “Aduna ako'y digri sa pagka-doktor, usa ka Ph.D., usa ka LL.D.” Alang kanako, mas nagapapahilayo kana gikan sa Dios kay sa kaniadtong misugod pa kamo. Oo, sir. Ginapahilayo

lamang kamo niana gikan sa Dios, wala kamo ginadala ngadto sa Dios. Ang usa lamang ka butang ang makapahiduol kaninyo sa Dios, ug kana mao ang Balaang Espiritu, pinaagi sa Iyang Pulong.

⁶⁷ Usa ka kompas ang Balaang Espiritu. Ang Amihanang Bitoon mao ang Pulong. Ug itudlo lamang kamo sa mao nga kompas ngadto sa Amihanang Bitoon. Ug itudlo lamang kamo sa Espiritu Santo ngadto sa Pulong, dili sa kung unsa nga ekuminikanhong kalihokan, dili sa kung unsa nga denominasyon, kondili ngadto sa Pulong sa Dios. Inyong hinumduman, ang tanang uban pa nga mga bitoon nagairog uban sa kalibutan, apan nagapabilin sa eksakto ang Amihanang Bitoon, tungod kay anaa kini sa sentro. Ug mapakyas ang pulong sa matag tawo, apan dili gayud mapakyas ang Pulong sa Dios. Kini mao ang Amihanang Bitoon, anaa sa sentro, dili Kini moirog uban sa kalibutan. Bisan asa pa ang kalibutan, nagapabilin Kini sa gihapon kagahapon, karon, ug hangtud sa kahangturan. Ug Siya mao ang Pulong!

⁶⁸ Igsoong lalaki ug igsoong babaye, ginahangyo ko kaninyo, sa Ngalan ni Jesus, nga pamalandongan ninyo Kini. Inyo akong gitoohan sa kung unsay akong gipangsulti kaninyo sulod na niining mga katuigan. Kung gipamatud-an sa Dios ang akong gipangsulti nga maoy Kamatuoran, dili ako, ang Iyang Pulong kini nga maoy dugay nang nagahimo niini, kung ingon-ana ginahangyo ko kaninyo, sa Ngalan ni Jesus, nga susihon ninyo Kini. Ayaw nga magmahimong buta sa niining mga butang; anaa kini mismo sa inyong atubangan.

⁶⁹ Hinumdumi, nag-ingon ang Biblia, diha sa Mateo 24:24, nga kadtong tanan nga ang mga ngalan wala nahisulat didto sa Libro sa Kinabuhi sa Cordero, sugod pa sa pagkatukod sa kalibutan, magadawat sa niini nga marka. Ang mga Pinili lamang, nga gipili nang daan nga makita Kini, ang makakita Niini. Ang tanang uban pa kanila mapalagpas Kini sa usa ka milyon ka milya.

⁷⁰ Makita nato kining dakung kalihokan nga nahan-ay na karon, ang dakung makinarya ni Satanas nahan-ay na. Ang butang na lang nga gikinahanglan niini maoy . . . Aduna na kini og mekanika, ginahulat na lang niini ang dinamika niini aron mapaandar kini. Pang-kinongregasyon ang maong kalihokan, usa ka dakung konseho ug ingon-anang butang. Anaa na dinha ang maong dakung makinarya, apan ginahulat na lang nila ang takna sa diha nga hukason na ang takuban, ug dayon mahimo na nila kini, ug ipamugos na kini, himoon kining usa na ka balaod. Tan-awa ninyo ang mga ginasibya ug ingon-anang mga butang nga madungog nato karon, diha sa radyo ug sa mga mantalaan. Aba, anaa na kini mismo kaninyo karon.

⁷¹ Wala na kita’y panahon sa pagbuhat og unsa pa man gawas ang pagdawat lamang kang Jesus Cristo. Bug-os na Siyang gipaila.

⁷² Paminaw, ginasulti nato ang mahitungod sa dakung makinarya ni Satanas didto, nga andam na nga molihok, husto kana, aron nga mangdugmok; apan, hinumdumi, ang gamay’ng panon sa Dios nga nagatoo sa Pulong, ang mekanika niini andam na usab. Andam na kini alang sa Dinamika aron padilaabon kini sa Espiritu Santo. “Ayaw kamo pagkahadlok, gamay’ng panon, gikahimut-an sa inyong Amahan ang paghatag kaninyo sa Gingharian.” Magaabot ang Espiritu Santo ngadto sa usa ka gamay’ng Iglesia nga migawas gikan sa kalibutan, mga kababayen-an nga tag-as ang mga buhok, mga Nazareo, sa pagpamatuod nga ila nang gihimulag ang ilang mga kaugalingon gikan sa mga . . .

⁷³ Ang Nazareo maoy usa nga . . . Unsa? Maoy usa nga ginahimulag ang ilang mga kaugalingon, alang sa Pulong sa Dios; dili nga nagasul-ob og syort, pinturado ang mga nawong, mga Jezabel, nagapatawag sa ilang mga kaugalingon nga mga Cristohanon; dili, sir; mga lalaking, huyang, nga mobarug alang sa usa ka denominasyon, ug nga manggunit sa sidsid sa sinina, sa kung kinsa nga Cesar o Herodes, imbis nga mobarug alang sa Pulong sa Dios. Apan aduna ang Dios og matinud-anon nga mga tawo, mga tinuod nga panon sa Dios, nga wala nagatan-aw kung unsa ma’y ginaingon sa kalibutan. Nagatoo sila nga si Jesus Cristo mao sa gihapon kagahapon, karon, ug hangtud sa kahangturan.

⁷⁴ Dili kini pupolar. Ginahimo ka niini nga dili-pupolar, apan Kamatuoran kini! Sugo sa Dios nga buhaton kini, ug buhaton kini sa Dios. Panalanginan kamo sa Dios. Dili ko tuyo nga kasaban kamo, kondili nga pahimangnoan kamo. Mas maayo pa nga mapaso kay sa masunog, sa unsa man nga oras, busa dawata ang pahimangno. Nagasulti ang Balaang Espiritu sa niining kaulahiang mga adlaw.

⁷⁵ Ang tanan nga atua nahisulat sa Libro makalingkawas niini. Karon makita nato, nga andam na ang gamay’ng panon para sa Dinamika nga lalinon Kini ngadto sa kawanangan, aron makalingkawas gikan sa tibuok niining kasakitan.

⁷⁶ May usa ka tawong miingon, sa miaging adlaw sa dihang nagasulti ako, miingon, “Igsoong Branham, kung ingon-ana wala ka nagatoo nga ang iglesia magaagi sa kasakitan?”

⁷⁷ Ingon ko, “Nagatoo ako moagi niini ang iglesia, apan dili ang Pangasaw-onon.” Magaagi ang iglesia sa kasakitan, oo, sir, apan dili maapil niini ang Pangasaw-onon. Paingon man siya ngadto sa Pagsakgaw, diha sa kalit, sa usa ka pagpamilok. Pagasakgawon siya aron sugaton ang iyang Ginoo, alang sa Pangkasal nga Panihapon. Wala siya’y pagaagihan nga unsa

man nga kasakitan; gibayaran na sa iyang Ginoo ang iyang bili. Mapasalamaton kita kaayo tungod niana. Oo, sir.

⁷⁸ Human sa pagsalikway, pareho sa iglesia ug sa nasud, aduna og usa na lang ka pagsinggit ang nagalanog, ang sunod nga lihok, maoy, “Ipalagpot Kini!”

⁷⁹ Ingon niana ang sunod nga singgit nga aduna kita. Malig-on nga gisalikway na sa iglesia ang Balaang Espiritu. Nahibalo kita nga gisalikway niya. Oh, ninggawas na ang mga miyembro gikan sa tanan nang mga butang, kana ang halapad nga pagtawag, Presbyterian, Methodist, Baptist, Lutheran; apan ang iglesia, mismo, ang denominasyon, dili kini makalihok. Dili, sir. Nahimo na kini nga denominasyon. Unsa na nga butang ang anaa niini karon? “Ilansang Kini sa krus! Ilansang Kini sa krus!” Ang unsa? Ginalansang sa krus, na usab, (ang unsa?) ang gipanghimatud-an nga Pulong, ingon nga mao ang Kamatuoran. Ang Pulong sa Dios, nga gilansang sa krus, na usab. Sama lang nga gidaut ni Eva ang tibuok pisikal nga kalibutan, pinaagi sa pagsalikway sa usa ra ka gamay nga tipik sa Pulong sa Dios, mao usab ang gibuhat sa iglesia.

⁸⁰ Mahimong moingon kamo kanako, “Igsoong Branham, aduna ka’y sayup nga interpretasyon Niini.” Bueno, inyo kanang opinyon.

⁸¹ Wala nagkinahanglan ang Dios og unsa man nga tighubad. Siya mismo nga Dios ang Kaugalingon Niyang tighubad. Mao kana ang problema, sa karon, aduna kita og daghan kaayong iya-sa-tawo nga mga tighubad. Mahimo sa Dios ang paghubad, Siya Mismo. Ang Kaugalingon Niyang pagpanghimatuod sa Iyang Pulong mao na ang interpretasyon niini.

⁸² Ang mga Fariseo kaniadto mahimong misinggit, usab, “Aduna kanamo ang interpretasyon!” Moingon ang Saduceo, “Aduna kanamo kini!” Apan si Jesus mao niadto ang interpretasyon. Amen.

⁸³ Ang pagpakita sa gipadayag nga gahum sa Dios, nga gisaad, mao ang kapanghimatuoran niini. Basaha ang mga Kasulatan ug tan-awa kung mamahimong unsa unta ang iglesia karon. Oo, sir. Wala ang Dios nagkinahanglan og unsa man nga tighubad.

⁸⁴ Ingon niana ang gibuhat nila kaniadto kang Jesus. Nakita nila, kaniadto, nga nagdahum sila nga wala Kaniya ang interpretasyon. Siya mao ang interpretasyon. Dili na kinahanglan sa Dios nga hubaron Kadto. Ang kinabuhi ni Jesus ang naghubad niadto. Miingon Siya, “Susiha ninyo ang mga Kasulatan, kay kamo nanaghunahuna nga diha Kanila may kinabuhi kamo nga Walay Katapusan; Kini Sila mao ang nanagpamatuod Kanako. Ug kung Ako wala magbuhat sa mga buhat sa Akong Amahan, kung ingon-ana ayaw kamo pagtoo Kanako. Kung ang mga buhat nga gisulti na mahitungod sa

niining adlaw, wala Niini Mismo nahipadayag diha Kanako,” miingon Siya, “kung ingon-ana ayaw toohi kini.”

⁸⁵ Gibuhat ba sa mga Niini kadto? Nag-ingon ang Dios, “Usa ka ulay ang manamkon,” ug nanamkon gayud siya! Nagatoo ba kamo niini? [Nagaingon ang kongregasyon, “Amen.”—Ed.] Sigurado; apan wala sila mitoo kaniadto. “Usa ka ulay ang manamkon,” ug nanamkon siya. Miingon Kini, “Makalakaw ang mga bakul, makakita ang mga buta,” ug unsay magakahitabo. Nagpamatuod Kini nga pagabuhaton sa mga Niini kini, ug si Jesus mao ang manipestasyon.

⁸⁶ Miingon si Moises, “Ang Ginoo nga inyong Dios magapatindog og usa ka Propeta, nga sama kanako.” Ang Pulong nagaabot ngadto sa propeta. Ug, ang propeta, ang Pulong maoy magtutugkad sa mga hunahuna sa kasingkasing. Sa diha nga nakita nila Siya nga ginapamuhat kadto nga mga pagtugkad, nanag-ingon sila, “Si Beelzebub kini, nga usa ka maghihimalad.” Wala na’y molabaw pa kay sa niana nga ngalan nga ilang gibansag Kaniya. Mao usab sa karon, ang tawgon nga usa ka “holy-roller,” o butang nga sama niana. Husto kana. Bisan nga . . .

⁸⁷ Wala Siya nagkinahanglan og interpretasyon. Siya mao ang interpretasyon. Gipamatud-an kini sa Dios pinaagi sa Iyang Kaugalingon. Kinsa man nga makasasala nga tawo sa karon, o kinsa man nga makasasala nga tawo kaniadto, ang mopanghimakak nga ang Pulong wala gihubad?

⁸⁸ Gipangutana sila ni Jesus, sa pag-ingon, “Susiha ninyo ang mga Kasulatan. Sila ang nagapamatuod kung Kinsa Ako. Sila mao ang interpretasyon. Kung ang Akong kinabuhi wala nagahubad sa kung unsay Akong ginahisgotan, kung ingon-ana ayaw Ako toohi.”

⁸⁹ Unsa man nga makakasala nga tawo ang aduna kaha karon, nga makatan-aw sa atubangan sa Biblia ug tan-awon kung ang Balaang Espiritu dili ba mao ang tighubad sa Pulong karon, nga ginapaila ang Iyang Kaugalingon pinaagi sa pagpadayag sa mga saad mahitungod sa mga gasa, ug sa mga butang nga Iyang gisaad nga pagabuhaton para sa niining panahon? Ang Malaquias 4 nga nagakatuman na, tanang uban pa nga mga Kasulatan nga nagakatuman na, ug nga makita mismo dinhi sa katapusan na nga panahon! Dili ninyo kinahanglan og kinsa man nga tawo aron hubaron Kini. Dili, sir. Ginahubad Niini ang Kaugalingon Niini. Nagapamatuod Kini nga ang Mensahe Kini alang sa niining panahon! Maghinulsol kamo ug magbalik sa Dios, tibuok kalibutan! Kamong mga kaiglesiahan, maghinulsol ug magbalik sa Dios! Ayaw ninyo sulayi nga ipanghunaw ninyo Siya gikan sa inyong mga kamot, tungod kay dili ninyo kini mahimo. Ania mismo karon ang mao nga hilisgutan, sama sa kung unsa kini kaniadto.

90 Miingon Siya, “Susiha ninyo ang mga Kasulatan; Sila mao ang nagapamatuod Kanako.” Miingon si Jesus, “Ang Akong mga buhat mao ang Akong tighubad.”

91 Giingnan Niya si Moises, sa diha nga gitagbo Niya siya didto sa nagadilaab nga sapinit, miingon Siya, “AKO MAO. Nahinumduman Ko ang Akong saad. Nahinumduman Ko nga Akong dalhon pagawas sila nga mga tawo, pinaagi sa usa ka kamot nga kusgan. Ako’y nagsaad, ug moadto Ako uban kanimo. Ginapadala Ko ikaw. Ikaw lang ang Akong tigpamaba, ug pagahubaron sa mga ilhanan kung ikaw ba’y Akong gipadala o dili.” Amen.

92 Ingon niana ang angay pangitaon sa mga kalalaken-an ug mga kababayen-an sa karon, usa ka saad sa usa na usab ka exodo, ug usa ka interpretasyon sa Pulong sa Dios ingon nga ginapadayag.

93 Ang problema niana, karon, moingon sila, “Bueno, wala man nagatoo ang akong iglesia Niini.” Unsa ma’y nagakahitabo? Nagakinabuhi kamo diha sa usa ka landong sa lain nga kapanahonan. Sila nga mga kaiglesiahan maayo man diha sa ilang mga kapanahonan kaniadto, apan unsa na man ang bahin niini nga kapanahonan? Lahi na kini nga kapanahonan.

94 Dili gayud ninyo mahimong patoohon si Wesley kang Luther, wala man didto og pagpakabalaan. Dili, sir.

95 Dili gayud ninyo mahimong patoohon ang Pentecostal sa Baptist, o sama niana, ang mobalik niana. Nakakaplag sila og butang nga mas maayo. Nagkinabuhi sila diha sa kahayag nga para sa ilang panahon.

96 Ug, karon, nag-organisa na ang Pentecost ug nagpahiluna na sama sa gibuhad nila kaniadto, eksaktong mao ra nga butang. Ug padayon nga nagaabante ang Pulong, ug nagaabante Kini mismo palayo gikan kanila. Husto gyud kana, tungod kay nagakatuskig na kita og ayo ug hilabihan na ka pormal. Ginapasagdan nato ang atong kaiglesiahan nga mopaingon sa unsa na lang nga matang sa kahimtang, gapatuyang na lang. “Basta nga aduna kita og mga miyembro, kana lang ang kinahanglan, tungod kay nagkadaghan pa gani kita kay sa kaniadto.” Atong ginapasigarbo kana.

97 Tugoting isulti ko kaninyo ang usa ka karaan na nga panultihon, nga, “Ginaihap sa yawa ang iyang panon, apan ginatimbang sa Dios ang mga Iya.”

98 Matuod kana, usab, bisan sa karon. Ginatimbang kamo sa Dios pinaagi sa Iyang Pulong, ginatan-aw kon nakulangan ba kamo o wala. Wala ko’y labot sa kadaghanan, kung unsa man ang kadaghanan, kung unsa man ka dili-inila Kini. Ang Pulong kini sa Dios nga nadayag para sa niining panahon. Eksaktong husto. Wala ko’y labot sa kadaghanan, ug kung kinsa man ang nagatambong ug kinsa man ang wala. Ang Pulong kini sa Dios

ang nakataya, sama kini kaniadto didto sa balay-hukmanan ni Pilato. Timbangon Kini, ug tan-awon kung unsay atong nakita, kon asa kita nakaplagan nga nakulangan. Oo, sir. Nagatoo kita nga si Jesus Cristo mao sa gihapon kagahapon, karon, ug hangtud sa kahangturan.

⁹⁹ Makita nato nga giingnan Niya si Moises nga, “magauban Ako kanimo, ug pagagamiton ko lang ang imong baba. Adto ka og isulti ang mga pulong nga Akong isulti kanimo, ug pagahubaron sa mga ilhanan ang mga kaugalingon niini.”

¹⁰⁰ Kita n’yo, wala nagkinahanglan ang Dios og tighubad. Oh, dili, dili siya kinahanglan ang tighubad. Ang hubad sa Dios ang nagapamatuod sa Iyang Kaugalingon. Nag-ingon Siya nga Siya mao ang tighubad sa Kaugalingon Niyang Pulong, ug Siya gayud. Gibuhat Niya kini, pinaagi kang Moises, ug Iya kining ginabuhar karon. Nailhan nato Siya, diha sa Biblia, ingon nga si Elohim. *Si Elohim* mao “ang Usa ra nga wala nagkinahanglan og unsa man aron mabuhi.” Wala Siya nagkinahanglan og tambag ni kinsa man. Nag-inusara Siya nga nagapabilin. Siya’y Dios, ug Siya mao ang Pulong. Ug pagmosaad ang Pulong og usa ka butang, ug ginapaila Kini sa inyong atubangan, unsa pa man nga matang sa interpretasyon ang gusto ninyo gawas niana?

¹⁰¹ Oh, makasasala nga lalaki o babaye, kinsa man ka nga mosupaksupak ug moingon nga sayup Kini? Sa diha nga ang Dios, pinaagi sa Iyang Balaan nga Espiritu ug sa gisaad nga Pulong, ginahubad na Kini diha sa atubangan sa matag usa kanato, si kinsa man kita nga moingon nga sayup Kini? Oh, makasasala nga tawo, unsa man nga mahimo mong buhaton kana? “‘Makasasala,’ unsa ma’y pasabot mo niana, Igsoong Branham?” Dili-pagtoo! Adunay usa lamang ka sala, kana ang dili-pagtoo. Dili na kinahanglan ang binuang nga interpretasyon sa tawo!

¹⁰² Ginahubad Niya ang Iyang Kaugalingon. “Ako mao ang Ginoo,” miingon Siya, “Ako ang nagtanum Niini; pagabisbisan Ko Kini, adlaw ug gabii, basin aduna pa’y moagaw Niini gikan sa Akong kamot.” Nag-ingon usab Siya, diha sa usa pa ka Kasulatan, nga, “Nagabantay Siya sa Iyang Pulong, sa pagbuhar Niini.” Sa *pagbuhar* Niini, “sa pagpadayag” Niini ngadto (sa unsa?) sa Iyang mga Pinili, ngadto sa mga gipadalhan niini aron makakita, nga gipadala ngadto sa mga makakita Niini, diay. Ginabuhar Niya Kini ngadto sa mga gipadala nga makakita, nga makakita Niini.

¹⁰³ Iya Kining ginabantayan, ginapapabilin Kini nga halayo sa tanan niining mga binuang og karnal nga mga interpretasyon, kining mga butang, nga, “*Kini* ang husto, ug *kana* ang husto, ug *kana* ang husto.” Ang Dios ang husto, ang gipaila nga tawo sa Dios!

104 Mahimong nanagtindog silang tanan nga mga Fariseo kaniadto, nanag-ingon, “Iya kami sa Dios! Aduna kanamo ang mga kasugoan. Aduna kami *niini*.” Ug didto nagatindog ang Pulong, Mismo. Nanag-ingon, “Papahawaa Kini! Ilansang Kini sa krus! Wala Kini nagapaila sa Kaugalingon Niini sa kung unsay among ginatoohan.”

105 Apan nagpaila Kini sa Kaugalingon Niini uban sa Pulong. Amen. Kadtong may mga mata nga makakita, nakita Kadto. Kadtong mga buta wala nakakita Niadto.

106 Dili usab nila buhaton kini karon. Kana lang. Sila’y, ila nang giselyohan ang ilang mga kaugalingon, daghanan kanila, ngapalayo Niini.

Oh, oo, pinaagi sa pagtuman Niini, nga ginapakita Kini nga matuod!

107 Ang uban nagaingon, “Ginatoohan ko ang ingon ka daghan Niini. Igsoong Branham, mahimo kong toohan ang Biblia. Nagapakig-uyon ako sa Biblia. Usa ako ka nakig-uyon sa Biblia. Ginatoohan ko ang ingon-ani ug ingon-ana. Nagatoo ako kang Jesus Cristo, ang Anak sa Dios. Apan dili ko lang matoohan ang tanan Niini, tungod kay nagaingon ang akong denominasyon nga dili man kono ingon niana Kini.”

108 Kung ingon-ana unsa man nga matang sa tighubad ang aduna kamo? Ang mao ra nga matang nga aduna si Eva kaniadto, ang yawa. Gapaninguhaan niyang ihubad ang Pulong ngadto kang Eva, ug miingon siya, “Oh, *kini* maoy husto, ug *kana’y* husto, apan siguradong. . .” Siguradong, husto! Kung unsa man ang ginaingon sa Dios, husto Kini! Wala ko’y labot kung daw sa unsa man kon tan-awon sa uban. Sa diha nga miingon ang Dios nga mahitabo kini, mamaingon gyud niana kini. Gamiton ba ninyo ang tighubad ni Eva? Oh, makasasala nga tawo, sa unsa man nga mahimo ninyo kana? Oo, sir. Aduna na kanila ang tighubad ni Eva.

109 Ang ebidensiya, sama sa giingon ko na sa miaging adlaw, ginapaninguhaan nato nga magplastar og ebidensiya. Miingon si Luther, “Magtoo, ug lakaw na.” Ang yawa nagatoo, usab. Miingon si Wesley, “Magsinggit, ug aduna na Kini kanimo,” apan nakaplagan niya nga wala pa kaniya. Miingon ang Pentecost, “Magsulti sa laing mga dila, ug aduna na Kini kaninyo.” Wala pa kanila. Miingon ang Christian Science, “Maghigugma, aduna na kaninyo ang bunga sa Espiritu,” apan wala pa kanila. Ilang ginasalikway ang pagka-Dios ni Jesus Cristo.

110 Unsa man ang ebidensiya Niini? Pag kanang espiritu nga anaa kaninyo mahimong puntohan og amen ang matag saad, ug pagapamatud-an kini sa Dios. Eksaktong ingon-ana kini kang Jesus Cristo. Oh, oo. Aduna sila kaniadto, aduna sila og mas daghan nga bunga sa espiritu, aduna sila og tanan na nga matang sa mga ebidensiya. Dili ninyo mahimong itaput ang

unsa man nga ebidensiya ngadto sa unsa man nga butang gawas sa Dios Mismo nga ginapadayag ang Iyang Pulong. Mao lang kana ang matuod nga ebidensiya ingon nga anaa nga ikaw usa ka Cristohanon. Unsaon man pagkahimo mong Cristohanon sa dihang. . .

¹¹¹ “Sa sinugdanan mao na ang Pulong, ug ang Pulong uban sa Dios, ug ang Pulong mao ang Dios. Ug ang Pulong nahimong tawo ug nagpuyo ipon kanato. Ang mao ra sa gihapon kagahapon, karon, ug hangtud sa kahangturan!” Siya ang mao ra nga Dios nga atua kang David. Siya ang Mao ra sa gihapon nga atua kang Moises. Siya ang Mao ra sa gihapon nga atua sa tanang mga apostoles. Ug Siya ang Mao ra sa gihapon nga atua kang Jesus Cristo, aron nga ipadayag ang Iyang Kaugalingon didto alang niadtong gisaad nga Pulong. Ug Siya ang mao sa gihapon nga Dios karon, ang mao ra nga Pulong, nga nagapasidlak og Kahayag ngadto sa Pulong alang sa niining kapanahonan. Hinaut nga kaloy-an kita sa Dios! Oo, sir. Nagatoo sa Dios nga ginahubad ang Iyang Kaugalingon, nga panghimatud-an ang matag Pulong! Oo, Siya Mismo ang Kaugalingon Niyang tighubad.

¹¹² Igsoon, ginahunahuna ko ang oras! Mahimo akong mopabilin og dugay-dugay pa para niini, apan aduna kamo’y panagtigum nga mosunod. Nagatoo ako, ug akong isulti, karon; kung dili kita magbantay, anaa Siya sa mga kamot kanatong mga Amerikano. Hunahunaa ninyo kini. Ginasulti ko kini dili tungod sa kasuko; ginasulti ko kini alang sa Kahayag. Ginasulti ko nga ang Dugo ni Jesus Cristo anaa karon diha sa kamot sa iglesiang Amerikano. Ginasulti ko nga ang Dugo ni Jesus Cristo anaa karon diha sa Amerika, sa kadaghanan. Batok ang Dugo ni Jesus Cristo sa mga Methodist, Presbyterian, Lutheran, mga Pentecostal. Anaa Kini diha sa mga kamot kanatong tanan. Tanawon nato kung mao ba gayud karon. Hunahunaa ninyo kini, ang Dugo ni Jesus Cristo! Oh, sus!

¹¹³ Ug sama kang Pilato niadtong adlawa, gipahinumdom ako niini mahitungod sa tulo ka paagi nga gipaninguhaan ni Pilato nga walaon Kini diha sa iyang kamot. Gisulayan niya ang tanang tulo ka paagi aron nga matangtang Kini sa iyang kamot, apan napakyas siya. Adunay usa lamang ka paagi aron matangtang Kini sa inyong kamot. Tanawon nato kung unsay iyang gibuhat. Gisulayan ni Pilato kining tulo ka paagi, ug napakyas kini tanan.

¹¹⁴ Atong kinahanglan atubangon ang mao nga hilisgutan. Nahibalo kita nga ania na kini, kay napaila na ang Iyang Pulong pinaagi sa kapanghimatuuran sa Kasulatan. Nahimo nang unod ang Pulong nga gikasaad alang sa niining panahon, bisan ang dautan nga bahin nga nagasalikway kang Jesus Cristo; ug Siya, sa niining Kapanahonan sa Laodicea, anaa na sa gawas sa iglesia. Nasayod kita nga mao kana ang Kamatuoran.

Hunahunaa ninyo kini, ang Dugo ni Jesus Cristo, ang Anak sa Dios, anaa diha sa atong mga kamot. Kamo'y... Nahadlok ako niana, ang hunahunaon kini. Ang tamakan Siya, nagahatud kini og pangurog, ang hunahunaon, nga Dugo ni Jesus Cristo!

¹¹⁵ Sa diha, nga ang tawo magbantay gayud sa dugo sa mismo niyang isigkatawo. Usa ka higayon didto sa Chicago, dili pa lang dugay, usa ka higala ko ang nagatindog didto sa diha nga ang usa sa—sa mga kapareho ni Dillinger, o unsa man kadto, gipusil didto sa dalan. Nanggitapok ang mga tawo didto, sa ginatus, ug nanagtindog silang tanan nga nakapalibot. Apan, ilang, usay ilang gibuhat? Kon diin nga dapit mikatag ang dugo didto sa dalan, ug kadtong inagian nga bangag sa bala, milakaw ang tanan nga tawo palibot ra niadtong dugo. Ayaw nilang matamakan ang dugo sa ilang isigkatawo. Oh, dili, sir. Matahapon sila kaayo mahitungod niana.

¹¹⁶ Apan tamakan nila mismo ang Dugo ni Jesus Cristo. Matuod sa gihapon kining karaan na nga panultihon, “Ang mga buangbuang motunob nga nagsul-ob ug mga sapatos nga nilansangan ang suylas sa lugar nga diin ang mga Manulonda nahadlok nga motunob.” Husto kana, tunoban nila Kini mismo, moingon “Nangagi na ang mga adlaw sa mga milagro. Okey lang kana para sa mga apostoles kaniadto, apan dili na para kanato.” Oh, sus, giunsa man ninyo pagsulti niana? Inyong ginayatakan ang Dugo ni Jesus Cristo nga maoy nagbalaan kaninyo! Oh, sus, hunahunaa ninyo ang maong Dugo diha sa atong mga kamot!

¹¹⁷ Unsa, dugo sa usa ka isigkatawo. Akong gihunahuna mga dugay na, mga pila na ka semana ang milabay, sa dihang gidahum nato nga dili kini mahitabo sa atong nasud. Unsa na man ang mahitungod niining lalaki, si Oswald? Nga atua didto sulod sa selda, gipaningut og bugnaw, kung kalmante siya sa iyang hunahuna.

¹¹⁸ Ug ginahunahuna ko ang usa ka tawong magapaminaw sa niini nga teyp, o ania karon nga nagalingkod, kon asa man, ug nagapaminaw sa Mensahe, nga ginayonon kini; ginapaningut og bugnaw, nasayod nga kinahanglan kang moatubang sa paghukom ug manubag ngadto sa Pulong sa Dios, manubag sa Dugo ni Jesus Cristo, nga napaila na kanimo, nga anaa sa imong mga kamot, nga anaa sa atong mga kamot.

¹¹⁹ Himatikdi si Oswald nga atua didto, mahimong daw sa unsa ka makalilisang nga butang para kaniya, o tingali unta, o siguro mao niadto, sa nahunahunaan niya nga magaatubang siya sa usa ka sukô nga Kinatas-ang Hukmanan dala ang maong kasuko tungod sa pagpatay sa ilang Presidente. Mamahimong wala na'y looy-looy. Ang bisan unsa man nga ebidensiya nga makuha nila batok kaniya, igaduot kini batok kaniya. Mga fingerprint, pusil, lugar kon diin siya niadto, ang tanan pagadalhon sa atubangan niya.

¹²⁰ Gamay ra kana nga butang ikumpara sa kung unsay mahitabo sa mga tawong nagalingkod sa niining mga panagtigum ug makita si Jesus Cristo nga nagatungha diha sa porma sa Iyang Pagkadios, ug nga ginapaila ang Iyang Kaugalingon, ug mogawas na lang kamo nga wala ninyo Siya ginadawat, nagapanghawid pa sa kung unsa nga gamay'ng kredo, o butang nga ginatawag ninyong dili mahinungdanon. Mamahimong gamay ra kana nga butang, pag-atua na kamo sa Presensiya sa sukô nga Dios, nga giyatakan ang...kamo nga mga nagyatak sa Dugo sa Kaugalingon Niyang Anak, ug nga gilansang na usab Siya sa krus diha sa inyong hunahuna, nga gibaylo ang inyong mga katungod sa pagkapanganay tungod lang sa popularidad. Mamahimo kining usa ka makalilisang nga butang nianang adlaw. Mamahimong usa kini ka makalilisang nga hunahunaon. Unsaon man ninyo pagpakahimutang sa nianang selda nga makapasingut?

¹²¹ Kamong mga lumad sa Aprika; kamong mga taga-Australia; Sweden; Switzerland; kamo, nga nagapaminaw sa niini nga teyp: Unsaon man ninyo pagpanubag sa Adlaw sa Paghukom, sa dihang nakaadto na ako sa inyong mga nasud ug inyong nakita ang pagpaila ni Jesus Cristo nga nagatungha sa taliwala sa mga tawo, ug nga ginapamatud-an ang Iyang Kaugalingon?

¹²² Ginapaningut, sus, siguradong ginapaningut siya og bugnaw! Oh, unsaon man niya pagbuhat niini kung kalmante siya sa iyang hunahuna?

¹²³ Unsa kaha nga matang sa usa ka sukô nga Dios ang tan-aw ninyo niini ang mahitabo alang ngadto sa mga nagyatak sa Anak sa Dios, ug nga gilansang na usab Siya sa krus?

¹²⁴ Himatikdi, ang usa ka piloto, sa diha nga nagaandam na siyang ipalupad ang eroplano. Igawas sa piloto ang eroplano, iyang usisaon ang tanan-tanan sa dili pa siya molakaw, ang matag instrumento. Moadto siya didto sa luparanan, ug motindog didto ug susihon kadtong mga ginakontrolar nga bahin sa pakô, susihon ang mga taklub sa iyang gasolina. Ang tanan-tanan, ang matag instrumento nga aduna siya, iya kining balik-balik nga susihon. Daghan kaninyo ang nakasakay na sa mga eroplano, ug nasayod kamo nga kamatuoran kana. Iyang ginasusi ang matag instrumento. Ngano man? Anaa sa iyang mga kamot ang dugo sa iyang isigkatawo. Gusto niyang masigurado nga ang tanan nga posibilidad nagaandar og maayo.

¹²⁵ Unsa na man ang bahin sa doktor diha sa usa ka operasyon, sa nahibaloan niya nga magaopera siya, tangtangan ang tumor o usa ka kasingkasing, o unsa man nga uban pa, ug operahan kini? Sa diha nga magaopera na siya sa imong lawas, iyang susihon ang imong kasingkasing, iyang susihon ang imong presyon sa dugo, iyang susihon kung ikaw ba aduna og unsa man nga sip-on, iyang susihon ang mga anestisya. Iyang ginasusi ang tanan-

tanan, pabalik-balik, ug pabalik-balik. Ngano man? Ayaw niyang maanaa sa iyang kamot ang dugo sa iyang isigkatawo.

¹²⁶ Ug kung ang doktor ug ang piloto, ug uban pa, magasusi, unsa pa kaha ka angay nga buhaton sa Iglesia ni Jesus Cristo, sa diha nga atong makita ang mga butang nga atong ginapuy-an karon? Mas maayo pa nga ato gayud susihon. Basin mabilin pa diha sa atong mga kamot ang Dugo ni Jesus Cristo.

¹²⁷ Karon atong hisgotan ang usa ka butang, ang unang paagi ni Pilato, maoy, “Wala ako’y nakitang sala Kaniya.”

¹²⁸ Daw sa unsa ka ingon niana gayud diha sa taliwala sa daghang maayo nga mga grupo karon! “Wala ako’y nakitang sayup sa Pulong. Okey Kini, apan alang ra man kana sa mga apostoles kaniadto.” Ang Biblia nag-ingon nga Siya mao sa gihapon kagahapon, karon, ug hangtud sa kahangturan! Moingon kamo, “Okey kanang Biblia. Nagatoo ako nga nanagsulti sila sa laing mga dila; nagatoo ako nga nagpagula sila og mga yawa; nagatoo ako nga nagtugkad sila og mga hunahuna; nagatoo ako nga adunay mga propeta kaniadto; apan dili sa niining panahon.” Oh, mister, makasasala nga tawo, unsa man ang nagakahitabo kanimo? Unsa ma’y nagakahitabo sa diha nga ang Mateo sa ika-28...24:24 balik nga nagakahayag? Ang Mga Hebreohanon 13:8 nagabalik diha sa inyong mga sabakan na usab.

¹²⁹ Si Pilato, dili niya mahimong ikapanghunaw Kini gikan sa iyang mga kamot nga sama niana. Dili, sir, nagabalik Kini mismo diha sa iyang sabakan. Ingon niana usab kini ngadto sa matag tawo, sa dihang atua kamo ug nakita nga ginatuman sa Dios ang Iyang saad.

¹³⁰ Nag-ingon si Pedro, niadtong Adlaw sa Pentecostes, “Maghinulsol, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa mga sala, ug madawat ninyo ang gasa nga Espiritu Santo. Kay ang saad alang kaninyo, ug sa inyong mga anak, ug kanila nga atua sa halayo, bisan ang kapid-an nga pagatawgon sa atong Ginoong Dios.”

¹³¹ Hangtud unsa ka halayo? “Sa tibuok kalibutan, sa matag nasud.” Miingon Kini nga ngadto sa matag nasud. “Panglakaw kamo sa tibuok kalibutan.” Wala Kini nakadangat pa dinha. “Iwali ang Maayong Balita sa tanang binuhat. Kini nga mga ilhanan maganunot kanila nga nagatoo.”

¹³² Unsaon man ninyo pagpanghunaw Niana gikan sa inyong mga kamot? Dili ninyo mahimo kini. Gipanghimatud-an Kini, ug gihatud balik dinha sa inyong sabakan. Nagabalik Kini mismo, sama sa nahitabo niadtong kang Pilato. Oh, oo, sir, nagakahitabo kini mismo kaninyo pag-usab, sa diha nga makita ninyo ang Kasulatan nga gipaila sa inyo mismong atubangan.

133 Ikaduha, sa diha nga patapos na kita. Ikaduha, makita nato, adunay usa pa ka paagi nga gisulayan ni Pilato nga buhaton, nga mao usab ang ginabuhat sa mga tawo karon, nga ipasa kini ngadto sa iyang mga Herodes ug mga Cesar. Daghang mga maayo kaayong mga ministro sa karon, mga Episcopalian, Presbyterian, Lutheran, Baptist, mga Pentecostal, ug uban pa, igapasa Kini, “Ang among headquarter maoy dili motugot nga buhaton ko kini.” Misumbalik kini. Nagasumbalik na usab kini karon.

134 Wala ko ginapangutana ang Assemblies of God, ang Oneness, ang church of God, ang Methodist, ang Baptist, ang Presbyterian. Kamo ang ginapangutana ko, ingon nga usa ka indibiduwal, unsa ba ang imong ginabuhat sa Dugo ni Jesus Cristo? Unsa ma’y atong buhaton sa niining dinihogan nga Pulong sa Dios nga ania mismo sa atubangan nato karon, nga nahibaloan nato nga mamahimong, mao ang Cristo, ang saad alang sa niining panahon? Unsa ma’y inyong buhaton Niini? Dili sa kung unsay buhaton sa inyong iglesia Niini. Wala og unsa man nga kahilambigitan niini ang iyong Cesar ug inyong Herodes. Wala kadto nakapalingkawas kang Pilato. Wala, sir. Wala, sir.

135 Silang mga Fariseo niadtong adlaw, nanag-ingon, “Ipapaningil lang kanamo ang Iyang Dugo, ug sa among kaanakan.” Gipaningil gayud. Eksakto gyud kana.

136 Unsa ma’y Iyang, si Jesus, gisulti ngadto kanila? “Makamao kamong moila sa dagway sa kalangitan, apan dili kamo makaila sa mga ilhanan sa kapanahonan.”

137 Ug, oh, wala ko ginasulti kini alang sa Phoenix, apan ginasulti ko kini alang sa kung asa man kini gustong mopaingon. Kamong buta nga mga Fariseo! Unsaon man ninyo, nga nagagasto og minilyon ka mga dolyares, nga maila ninyo ang komunismo; apan ang Pulong sa Dios, usa ka gipanghimatud-an alang niining kapanahonan, dili ninyo maila? Inyo Kining ginalansang na usab sa krus. Nahibaloan ninyo ang tanan mahitungod sa komunismo; kung nahibalo kamo sa inyong Biblia, nahibaloan unta ninyo nga kinahanglan nga mahitabo ang mao nga butang. Wala kana nakapaikag kanako. Gikaligutgutan ko ang komunismo. Gikaligutgutan ko ang unsa man nga butang nga batok sa Dios. Apan ang nakapaikag kanako mao kini, ang Iglesia nga andam na alang sa niini nga panahon, alang sa pagbiya na sa Pangasaw-onon.

138 “Makamao moila sa dagway sa kalangitan, apan dili makaila sa mga ilhanan sa kapanahonan.”

139 Ug diha sa pagbista Kaniya karon, anaa na sa mga hukmanang Federal aron himoon na kining Council of Churches, ug tanan na. Makamao mo sa pag-ila sa komunismo ug sa tanan niining mga butang nga ginawali sa mga magwawali; ug ginatamakan mismo ang maong mga ilhanan sa kapanahonan, ug ginatawag Kini nga usa ka “panatisismo,” ginatawag Kini

og “mental telepathy,” o butang nga sama niana, ug mohawa, ug did-an ang mga tawo bisan man lang sa pag-adto og pagpaminaw Niini. Kung wala ginabalik sa kasaysayan ang kaugalingon niini, ako, dili William Branham ang akong ngalan. Husto gayud. Unsa ma’y mahitabo? Ginapahibalik mismo niini ang Dugo ni Jesus Cristo diha sa inyong mga kamot, ug ginatawag ninyo Kini nga usa ka “mahugaw’ng espiritu,” sama sa ilang gibuhath kaniadto.

¹⁴⁰ Sa tibuok kalibutan! Siguro nakahibalo na kamo kung unsay akong pasabot niana. Sa tanan na nga dapit! Nganong inyo man akong gibalibaran, dinha sa Switzerland? Nganong gibuhath ninyo kini, dinha sa Finland? Mamaanaa ang maong Dugo sa kaugalingon ninyong mga kamot. Maanaa kana kaninyo. Dili kanako, dili gyud ako ang inyong gibalibaran; Siya ang inyong gibalibaran, dili ako, tungod nga nanag-ingon kamo, “Wala ako nagatoo sa *mga ingon-niana*.” Ang Pulong ang nagasulti sa mga ingon niana! Mao kana. Buta nga mga Fariseo, makamao sila sa pag-ila sa komunismo, makaila sa tanan niining mga butanga, apan, ang panahon nga ilang gikapuy-an, dili nila maila kini. Husto gyud kana.

¹⁴¹ Karon hapit na kini modangat sa iyahang (sus!) kaulahiag katuyoan na usab. Ania na usab ang maong makuyaw nga higayon. Unsa man kini? “Ilansang Siya sa krus! Dili nato mahimong. . .Dili nato silang tanan mahimo nga Methodist tanan; dili nato mahimo sila nga Baptist tanan; dili nato mahimo sila nga Oneness tanan; dili nato mahimo sila nga Trinity tanan; dili nato mahimo sila nga tanan *ingon-ani*, *ingon-ana*, o *uban pa*; apan mahimo nato nga magkaaduna og usa ka konseho.” Kon diin, dili kamo magkauyonay sama sa kon unsa ka halayo ang Sidlakan gikan sa Kasadpan, ug sayup ang maong tibuok butang. Usa kini ka ulipong sumusunod sa Roma. Husto gyud kana.

¹⁴² Karon, ingon nga usa ka indibiduwal, akong pangutan-on kamo. Unsa ma’y inyong pagabuhaton niining dinihogan nga Pulong nga mao ang Cristo, ang Pulong nga gikasaad alang niining panahona? Ikaw, ingon nga usa ka indibiduwal?

¹⁴³ Wala gayud ni Pilato natangtang Kini gikan sa iyang mga kamot. Nakahibalo kamo niana. Misiyagit siya, mihilak siya, ug tanan na nga paagi nga mahimo niya. Napakyas siya nga mahimo kadto. Adunay usa ka sugilanon didto dapit sa Switzerland, kon diin ang ber- . . . may nagabulwak nga asul nga tubig, kon diin siya nagpakamatay kaniadto. Kabalo na mo sa kasaysayan niini. Sa kaulahian nabuang siya, ug nagpakamatay siya. Nganong wala man siya naghinulsol? Dili siya makahinulsol, sama kang Esau kaniadto nga dili makahinulsol. Gibuhath niya na kadto! Ayaw gayud tugoti nga mahitabo kana kaninyo.

144 Anaa Siya diha sa inyong mga kamot. Nahimo na ang mga buhat, giwali na ang Biblia, gipaila na Kini sa Espiritu Santo. Ang si kinsa man nga makasasala nga tawo, mangahas ka pa nga isulti nga dili ingon niini Kini, ang Espiritu Santo sa niining kaulahiing mga adlaw! Ug ang mga Pulong nga gisulti na, gisulti na nga mahitabo Kini, ug ania na Kini sa ato mismong atubangan.

145 Ayaw gayud sulayi nga buhaton kini. Ayaw gayud tugoti nga ang inyong katapusan mamahimong sama kang Pilato. Ayaw gayud. Iya unta Siyang gidawat sa iyang kasingkasing. Mao lang kana ang paagi nga mahimo ninyong tantangan Siya gikan sa inyong mga kamot, mao ang pagdawat Kaniya diha sa inyong kasingkasing. Oh, ayaw gayud buhata ang mao ra nga sayup.

146 Paminawa, ang Mga Hebreohanon 10 nagaingon niini, “Kung magpakasala kita sa tinuyo,” tinuyo nga dili magtoo, “human ta madawat ang kahibalo sa Kamatuoran, wala na’y nahibilin pa nga halad-inihaw para sa mga sala.” Kung magpakasala kamo sa tinuyo human nga napaila na Kini kaninyo, ug dayon isalikway ninyo Kini, wala na gayud kamo’y kahigayonan pa nga maghinulsol.

147 Sa makadiyut lang, aduna ko’y sinulat dinhi nga gusto kong dalhon kaninyo sa dili pa kita magtapos.

148 Sama sa mga espiya niadtong paingon sila sa yutang saad. Atua sila sa usa ka exodo, pagawas gikan sa Egipto, migawas pinaagi sa usa ka gikasaad nga Pulong sa Dios. Gipaila sa Dios kaniadto ang Iyang Pulong pinaagi sa usa ka propeta, si Moises, nga gipadala kini didto. Gipaila Siya nga Siya mao ang Dios nga magadala kaniya ilalum diha sa mga kahimtang nga Iya nang gikasaad, ang “AKO MAO.”

149 Sa dihang miabot sila ngadto sa utlanan na nga kayutaan, sa Kadesh-barnea, nahimo nila ang dakung kasaypanan, sa diha nga miabot na sila sa kayutaan ug milantaw didto sa dapit sa yutang saad, nanag-ingon sila, “Dili nato mahimo ang pagsakup niini.” Unsa na ang sa uban nga napulo? Gilantaw nila ang mga kahimtang, ang kadungganang nga mawala kanila. “Mga dulong lamang kita, sa kiliran nila.”

150 Apan si Josue ug si Caleb nagsusi. Mibalik sila ngadto sa Pulong, ug nag-ingon ang Ginoo, “Akong ginahatag kini nga yuta kaninyo! Maayo kini nga yuta, nga nagapaagay og gatas ug dugos.” Wala nila gitagad kung unsa man ang itsura niadto, kung unsa ba *kini*, ug kung unsa ba ang ebidensiya *niini*. Nag-ingon na ang Pulong sa Dios, “Gihatag Ko na kini kaninyo! Adtoi og kuhaa kini!” Ug sila lang ang maoy nakasulod.

151 Oh, atong susihon ang mga saad sa Dios alang sa karong panahon. Husto kana. Hinumdumi, ania kita sa usa na usab ka exodo, usa ka panahon; usa ka exodo, niining panahon, dili nga paingon sa yutang saad nga anaa sa kalibutan, kondili ngadto

sa Yutang saad sa Kahimayaan, kon diin wala na'y pagbalik pa. Himaya sa Dios, paadto na kita didto! [Blangko nga bahin sa teyp—Ed.]

Buhaton ba ninyo kini, samtang nga atong ginaduko ang atong mga ulo?

¹⁵² Gusto kong ipangutana kini nga pangutana samtang nga nagahilum ang matag lalaki ug babaye. Unsa ma'y inyong pagabuhaton sa niining Jesus nga gitawag og Cristo? Dawaton ba ninyo Siya? Pagadawaton ba ninyo Siya ingon nga inyong Manluluwas? Mamahimo kaha kamong usa ka . . . O, ipanghunaw kaha ninyo Siya gikan sa inyong mga kamot? Sulayan kaha ninyo nga ipasa-pasa, “Bueno, ang akong—ang akong kredo wala nagaingon Niini,” o, “ang akong denominasyon wala nagatoo Niini nga ingon niana”? Anaa Kini diha sa inyong mga kamot. Dili kamo makalingkawas Niini. Unsa ma'y inyong pagabuhaton kang Jesus nga gitawag og Cristo? Anaa na dinha sa inyong mga kamot ang Iyang Dugo, sukad pa niining semana sa panagtigum.

Mag-ampo kita.

¹⁵³ Ginoong Jesus, tabangi kami karon mismo niining taknaa. Tugoting maania kanamo ang Imong grasya ug kalooy. Tugoting makita sa niining kongregasyon, Ginoo, nga Ikaw ang Dios, ug wala na'y uban pa gawas Kanimo. Tugoti nga ang Gahum sa Dios karon, ang Pulong, igapaila ang Kaugalingon Niini, sa niining mga tawo, aron mailhan nga Ikaw ang Dios, ug nga gisulti ko ang Kamatuoran, Ginoo. Gibuhat ko kini, niini, sumala sa Imong sugo; sama sa giingon ni Elias kaniadto, “Ako kining tanan gibuhat sumala sa Imong sugo.” Itugot, Ginoo, nga mamaingon niana kini, sa Ngalan ni Jesus Cristo. Amen.

Karon nga nanagduko ang inyong mga ulo, ang matag usa kaninyo.

¹⁵⁴ Kalit akong gipahunong sa Balaang Espiritu, kaganina, sa dihang misugod ako sa pag-ampo. Miingon Siya, “Adunay pipila dinhi nga wala pa nakahibalo niana.” Hinaut nga ang Dios sa Langit dili pasagdan nga wala kamo og bisan unsa, hinaut nga Iyang ilabay Kini balik sa inyong sabakan karon, kung ingon-ana.

¹⁵⁵ Kamong mga tawong masakiton nga ania dinhi. Wala ko pa gayud kini nabuhat diha sa usa ka panagtigum sa Business Men. Kamong masakiton nga mga tawong ania dinhi, nga nagatoo sa Dios, ug nagatoo nga aduna kamo'y pagtoo sa paghikap sa Iyang bisti. Ug, hinumdumi, nag-ingon ang Biblia, diha sa Mga Hebreohanon 4, “Ang Pulong sa Dios labi pang mahait kay sa espada nga duhay sulab, magtutugkad sa mga hunahuna nga anaa sulod sa kasingkasing.” Nasayod kitang tanan niana. Nagatoo ba kamo Niini? Mahimo ba kamong mag-ampo?

¹⁵⁶ Wala usá maglihok nga usa ka tawo sugod karon. Ang tanan magmatinahuron gayud, mohilum gayud, mohilum gayud. Mag-

ampo. Ug hinaut nga ang Espiritu Santo karon magapanguna kanato kung unsay buhaton ug kung unsay isulti, tungod niining makuyaw nga takna nga ania karon batok kanato.

¹⁵⁷ Ginoong Jesus, anaa na kini sa Imong mga kamot. Anaa ako sa Imong mga kamot. Akong ginatugyan ang akong kaugalingon Kanimo. Ipaingon Kini dinha sa ilang mga sabakan, Ginoo, ibalik na usab Kini. Sigurado, nga ang Imong Balaan nga Espiritu nagasulti kanako dinhi kung unsay husto ug sayup. Ug nasayod ako nga daghan ang pagatagbuon sa niining teyp dinha, ug nagaampo ako nga Imong ipahibalo kini karon nga gisulti ko kanila ang Kamatuoran, ug gipadala ako tungod niini, sama sa gisulti Mo didto sa suba niadtong oras sa diha nga mitindog didto ang Manolunda sa Ginoo sa niadtong Haligi nga Kalayo. Ipahibalo karon nga gisulti ko ang Kamatuoran, pinaagi sa Ngalan ni Jesus Cristo. Amen.

¹⁵⁸ Ihangad na ang inyong mga ulo karon. Pagtan-aw sa niining direksyon, ug dili gayud magduhaduha. Ang Dios nga Makagagahum sa tanan ang mamahimong maghuhukom kanato.

¹⁵⁹ Sa dihang ania pa si Jesus Cristo sa yuta! Sa dihang namatay Siya, gipang-ayo Niya ang mga masakiton, giluwat Niya ang mga nangawala. Nagatoo ba kamo niana? [Nagaingon ang kongregasyon, "Amen."—Ed.] Apan sa ania pa Siya, giunsa man nila pagkahibalo nga Siya kadto, tungod kay Siya mao ang Pulong. Pila man ang nakahibalo nga matuod kana? ["Amen."] Siya mao ang Pulong, ug ginatugkad sa Pulong ang mga hunahuna nga anaa sulod sa kasingkasing. Husto ba kana? ["Amen."]

¹⁶⁰ Wala ko'y makita nga tawo sulod niining bilding, niining orasa, nga nailhan ko, gawas sa niining mga pastor, ug uban pa, dinha sa likod.

¹⁶¹ O, tingali ania si Igsoong Roberts, siya na lang ang ipasugod ko sa linya sa pagpaampo. Anaa ba dinha sa Igsoong Roberts? [Adunay nagaingon, "Wala."—Ed.] Wala siya dinhi. Sige.

¹⁶² Ang ministerio ko ang mobuhat niining higayona. Ako kamong ginahagit, sa Ngalan ni Jesus Cristo, nga toohan ako, nga nagsulti ako sa Kamatuoran bahin sa Pulong, ug toohan nga kung unsa ang gisulti ko mao ang Kamatuoran. Mahimo ba ninyo kana? [Nagaingon ang kongregasyon, "Amen."—Ed.]

Hinaut nga mahitabo kini, Ginoo, hinaut nga mahitabo.

¹⁶³ Adunay usa ka lalaki nga nagalingkod dinhi. Gusto ko nga ilantaw ninyo ang inyong mga mata; dili ba ninyo makita kanang Kahayag nga nagapaibabaw dinha? Adunay usa ka lalaki nga nagalingkod dinha, nga nagalantaw kanako, nagaampo. Nagaantus siya sa usa ka sakit sa bagà, ug maluya. Ayaw pakyasa kini, sir. Mr. Carr, tindog ka ug dawata ang imong pag-

ayo. Giayo ka na ni Jesus Cristo. Wala ko pa gayud nakita ang maong lalaki, sa tibuok kong kinabuhi.

¹⁶⁴ Adunay usa ka lalaki dinha sa likod, maayo kaayo, nagaampo usab siya. Apan unsa man ang problema nianang tawhana, kana nga tawo dinha adunay sakit sa mata. Adunay usa ka nagtubo nga bukol diha sa iyang wala nga bahin. Ang iyang ngalan mao si Mr. Bartlett. Nagatoo ikaw! Husto ba kana, sir? Usa ba ako ka dili kaila nimo? Iwarawara ang imong kamot; nga bug-os kitang dili magkaila. Husto kana. Panalanginan ka sa Dios. Toohi, nga mamaayo ka.

Magtoo kamo!

¹⁶⁵ Para man sa unsa nga ginasulti mo kana kaniya? Nagatoo ka ba kanako ingon nga Iyang propeta, sir? Oo, sir. Nagaantus ka sa usa ka espirituwal nga problema, usa ka gamay'ng problema sa negosyo ug sa ingon-anang mga butang. Husto kana. Husto kana. Mr. Clawson, nagatoo ka ba sa tibuok mong kasingkasing nga tul-iron kini ni Jesus para kanimo? Mao ba kana ang imong ngalan? Mao ba kana ang puwesto mo? Sige, maangkon mo kung unsa ang gihangyo mo. Amen.

¹⁶⁶ Aduna *dinhi* dapit nga nagatoo Niini, amen, usa ka tawo nga may tinuod nga pagtoo nga iya sa Espiritu Santo.

¹⁶⁷ Mrs. Waldroff, makita ko kana. Ako, kaila ko kanimo. Dili, dili kini para kanimo. Para kini nianang gamay'ng bata, ug kana nga bata maoy imong apo na sa tuhod nga lalaki. Wala ko pa gayud siya nakita, sa tibuok kong kinabuhi. Mao kana ang kamatuoran. Nagaantus ang mao nga bata sa usa ka sakit sa mata nga ang allergy nga nagkaaduna siya mao ang hinungdan niini. Kana ang MAO KINI ANG GINAINGON SA GINOO. Magtoo ka!

¹⁶⁸ Gining, masakiton ka kaayo. Nerbiyosa ka, adunay sakit sa tiyan, halos anaa na sa usa ka sawanon nga pagkanerbiyos. Nagatoo ka ba nga pagaayohon ka sa Dios? Maria, toohi sa tibuok mong kasingkasing, ug igahatag ni Jesus Cristo kanimo ang imong pangandoy.

Anaa Siya diha sa inyong sabakan!

¹⁶⁹ Ania ang usa ka gamay nga babayeng nagalingkod dinhi, nga nagaampo, nagalantaw diretso kanako, nga nagduko. Magtindog ka ug magtan-aw kanako. Maayong tawo. Dili ikaw taga-dinhi. Gikan ka sa halayo pa dinhi, New York. Apan kung toohan mo nga pagaayohon kini ni Jesus Cristo, igahatag Niya kanimo ang bautismo sa Espiritu Santo. Nagatoo ka ba niana? Mrs. Bryan nga taga-New York, toohi sa tibuok mong kasingkasing, ug madawat mo ang Espiritu Santo mismo karon.

¹⁷⁰ Anaa na Kini sa inyong sabakan, mga higala! Nagatoo ba kamo Niini, ang Pulong nga ginahimong dayag ang Kaugalingon Niini? Nagatoo ba kamo nga si Jesus Cristo mao sa gihapon

kagahapon, karon, ug hangtud sa kahangturan? Wala ako nakaila sa niining mga tawo. Ang Dios ang akong Maghuhukom, wala ako nakaila sa niining mga tawo. Nakaila si Jesus Cristo kanila. Unsa ma'y inyong pagabuhaton sa niining dinihogan nga Pulong, sama sa Iyang giingon, "Sama sa nahitabo kaniadto sa Sodoma, mao usab kini ang mahitabo pag-abot sa Anak sa tawo"? Kung kini nga bahin matuod, ang Mensahe nga akong giwali matuod. Ang Espiritu Santo Kini, Mismo, nga ginabuhat ang Kaugalingon Niyang paghubad, nga husto Kini. Amen. Toohi ninyo kini sa tibuok ninyong kasingkasing! Mahimo ba ninyo kini?

¹⁷¹ Magtindog kamo ug dawata Kini, sa Ngalan ni Jesus Cristo.

¹⁷² Samtang nga ania ang Espiritu Santo, gusto kong ipandong ang akong mga kamot sa mga panyo dinhi. Atong ibayaw ang atong mga kamot ngadto kang Cristo.

¹⁷³ Ginoong Jesus, nagatoo kami Kanimo. Nasayod kami nga Ikaw mao ang Kamatuoran, ang Kahayag, ang Pulong. Akong ginapandong ang akong mga kamot ibabaw niining mga panyo. Nagaampo ako, Ginoong Jesus, nga palibotan sa Imong gahum ang tibuok niining bilding ug tanan niini nga mga panyo, kining mga amerikana ug mga kapa. Ug hinaut nga moanha kanila ang Espiritu Santo, Ginoo. Itugot kini. Ug hinaut nga mangaayo sila, ang matag usa kanila, kay ang Imong Pulong mao ang Kamatuoran. Itugot kini, Ginoo.

¹⁷⁴ Karon sa matag usa diha sa kongregasyon, unsa ma'y inyong pagabuhaton niining Jesus nga gitawag og Cristo? Anaa na kini sa inyong kamot. Ayaw tugoti ang mga tawo nga sultihan kamong. . . Pasabot ko ang mga tawo nga nagapaminaw niining teyp, ang mga nanambong dinhi nga mga tawo, unsa ma'y inyong buhaton niini karon? Nganong dili man ninyo Siya dawaton, ang matag masakiton nga ania dinhi? Ang matag nagaduhaduha nga lalaki dinhi, ang matag nagaduhaduha nga babaye, nganong dili man ninyo Siya dawaton ingon nga inyong Manluluwas? Dili gayud ninyo Siya mahimong ipanghunaw nga matangtang sa inyong kamot. Ang inyong kredo dili gayud makapatangtang Kaniya. Walay igong sabon nga Fuller nga makapatangtang Niini. Usa lamang ka butang ang mahimo ninyong buhaton, ipasulod Siya sa inyong kasingkasing! Amen. Dawaton ba ninyo Kini? Ipataas ang inyong mga kamot kung ingon-ana. Ug moingon. . . Ihatag Kaniya ang pagdayeg ug himaya.

¹⁷⁵ Langitnong Amahan, Imoha sila. Napaila na ang Imong Pulong. Imoha ang maong mga tawo. Ginatugyan ko sila Kanimo, sa Ngalan ni Jesus Cristo. Amen.

¹⁷⁶ Ipataas ang inyong mga kamot karon ug dayegon Siya. Ug ginahatag ko Siya kaninyo, sa Ngalan ni Jesus Cristo.



*UNSA'Y ATONG PAGABUHATON NIINING
JESUS NGA GITAWAG OG CRISTO? CEB64-0126*
(What Shall We Do With This Jesus Called Christ?)

Kining Mensahe ni Igsoong William Marrion Branham, una giwali sa Ingles niadtong Dominggo sa hapon, Enero 26, 1964, didto sa Ramada Inn sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org